



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 7



Yimtenren nung tajangzük atema yimsü amshir: Priyanka Gandhi

Taoba Niger tir Bazoum-i ECOWAS dang pa chioktsü mepishir



VOL. XX NO. 341 (ADOK 341) DIMAPUR ROGONÜ (FRIDAY)

RONGJUI (SEPTEMBER) 22, 2023

₹ 5.00

## Dimapur-Kiphire sumo ka lenküpoki ai, nisung 11 yiru

**Kohima, Rongjui/Sept. 21 (TYO):** Kohima district kübok Viswema-Kidima tsüngta Viswema yimtsüng kübok Krayo nung sumo ka lenküpoki leni ajuzüka aluba lendong nung nisung 11 yiru aser parnok rongnung nisung ana kanga sashia yirua liasü.

Police osang ajanga ashiba agi iba Tata Sumo ya Dimapur nung Kiphire leni aodang Bresthibarnep 10:00 ako meta iba lendong ya ajurua liasü.

Iba gari nungya driver dena

nisung 11 mena liasü. Gari nung timtem kar adoka iba gari ya lenküpokleni alu, ta osang ajanga ashi.

Iba lenmang nung senzürtem aser yimdaklar temi iba lendong ajurur alirtem kumzükka liasü.

Iba gari nung mena alir nisung ana kanga sashia yiru - tetsür ka teka raksa aser tebur ka tekolak yiru, saka tang tajungba lir aser dangartem ya tera yirua liasü aser first aid agütsür yok, ta osang ajangasa ashi.

## Jana indokba tesem tekeraba nung melentsü akhanger

**Dimapur, Rongjui/Sept. 21 (TYO):** Dimapur yimti kübok Sunrise colony nung jana-reja bendenba tesem küm ka tsüngta melentsü asoshi taoba mapang osang kakat balala nung National Green Tribunal (NGT) ajanga Dimapur Municipal Council (DMC) aser state sorkar dang tuyuba ama temolung agüja iba mera agitsü Joint Ward Council Forum Ward 2 & 22, Burma Camp ajanga sangdong ka nung ayongzükka liasü.

Iba jana-reja indokba tesem anasa alirtem aser nüburtem ajungtsü mechi NGT ajanga tuyuba ama iba maparen temolung agüja inyaka tesem belentsü Nagaland sorkar dang ayongzük, ta sangdong ajanga ashi.

Maneni DMC danga National Green Tribunal guidelines of waste management act 2016 & 2020 nung anidaksü JCWF ward 3&22 Burma camp ajanga ayongzükka liasü.

## Yimjung alitsü mechi Manipur nung sepai 80,000 dak tema lir

**Imphal, Rongjui/Sept. 21 (Agencies):** Border Security Forces (BSF) züngsem 200 Bresthibarnü Imphal International Airport tonga aruogo, ta Manipur nung ketdangsur osang kar ajanga ashi. Parnok ya Air India tayimtsü balaka nung Imphal tonga aru aser ano anogo ka-ana tsüngta BSF personnel 1100 arutsü lir.

Indian para-military forces temi Manipur nung tang kin balala tsüngta mangatetep adoka aliba mapang yimjung asoshi Manipur ketdangsur yarir aser Kuki aser Meitei nunger tesem balala nung

prokshia alirtem nem teyari agütsür.

Sorkari para-military forces talila 4,500 shi meshi aser India sorkari state nung tensa azüoktsü asoshi BSF nungi sepai 1100 yoktsü molung, ta Manipur sorkar ketdangsur temi ashi.

Manipur police, India Reserve Battalion, Manipur Rifles, Border Affairs of police, Village Defence Forces para-military forces sepai 30,000 shi aliba den ano Manipur nung yimjung tanaben bener arutsü mechi army, RAP, CRPF, BSF, Assam Rifles, Indo-Tibetan Border Police züngsem 80,000 shi lir.

## Dimapur nung dengue cases aoksatsüsabo mali: Minister Paiwang



Minister, Health & Family Welfare, P. Paiwang Konyak-i September 21, 2023 nü District Hospital Dimapur nung doctor tem aser osangbenertem den jembidang tangokba noksa ka yangi angur.

**Dimapur, Rongjui/Sept. 21 (TYO):** Sorkar aser jurila mozüki nungi doctor tem den senden balala amenba aser dengue tashidak indang osang tejanga bendenba sülen Minister, Health & Family Welfare, P. Paiwang Konyak-i Dimapur nung dengue tashidak pokteta aliba ya kanga aoksatsüsabo masü ta ashi aser nüburtem dang tsüboa malitsü ayongzük.

Bresthibarnü Chümoukedima police hospital, Christian Institute Health, Science and Research aser District Hospital Dimapur semdangba sülen doctor aser osangbener den jembidang pai iba o ya shia liasü.

Dengue tashidak agi meneper tali akumnungbo ta tangatetba nung mozüki asemprong nung renemshiba nung pa temolung asüba lemsatetep aser nungdakba nung yaritsü ta pai ashi.

Dimapur nung dengue tashidak pokteta aliba indang jembidang, tang aliba tensa ya wara (epidemic) ka ama mezüngshitet, kechiaser tawa data bendenba nung shiranger 100 nungi shilem 70 dak temang tera metaba den dengue ama shirangba lir aser shilem 30 dang dengue tashidak lir aser item rongnung ana mesüra asem dang kanga mejungi shiranga azü nungdaka lir, ta Minister Paiwang-i ashi.

Anungji tang aliba tensa ya ano wara ka ama züngshitsü jenjang matong, ta pai ashi.

Dengue tashidak azüoktsü asoshi sorkari nungdakba mera ajak agitar aser 'platelets' aser azü peria yua lir, ta pai ashi.

Minister Paiwang-isa dengue tashidak azüoktsü asoshi tasa tongtipangtibaji iba tashidak poktetba tesem ajema kumdaktsüsüba ya lir, ta ashi.

Merila asütsü mozü akhaba

(fogging) kisung nung temolung alemla masü, anungji mürekmejuba nung tajangzük aliba nüburtem nem angatetdaksütsü kanga tongtipang lir, ta pai ashi.

DTF tentetba den külemi pai ward ketdangsurtem, chairmen tem, GBs aser kiyong balala nung lenirtem dang iba tashidak asoshi nübur nem awareness agütsütsü pai ayongzük.

Pai ano temang rongga aliba teintet rogotem dang menungdakba nung senzüsempom masütsü ajungshi aser Dimapur nung alirtem dang iba tashidak agi menep ama kangshia alirtem dang pei yimtsüng bushia maotsü ashi.

Iba tashidak tajungtiba nung azüoktsü mechi Minister Paiwang-i lokti tentet balala dang lungjemtsü aser tashidak nungi jenbua alitsü awareness agütsütsü ayongzükka liasü.

## Manipur litsü-lika wazüka ayutsü atema Manipur Naga MLA temi meyongnem magütsü: Minister Newmai

**Kohima, Rongjui/Sept. 21 (TYO):** Manipur state indang litsü-lika wazüka ayutsü asoshi document mesüra representation agütsüba kecha nunga Manipur nung aliba Naga nunger MLA temi meyongnem agüja mali, ta Manipur sorkar nung Ministr aser NPF Manipur State Unit tir, Awangbow Newmai-i ashi.

Bresthibarnü NPF Central Office Kohima nung Naga Peoples' Front (NPF) Manipur State unit ketdangpur tasen shima tenangzüktep agiba sentong nung jembidang pai iba olen ya ashi.

Manipur state indang litsü-lika wazüka ayutsü asoshi Manipur nung ruling MLA temi Ato Kilonser Narendra Modi dangi tezuluba agütsüba nung Manipur Naga MLA tem dena lir ta olu prokshia state telung nung aser alema orr talisa Nagaland nungi lokti tentet aser political party temi aija liasü, ta pai ashi.

Item osang ya tamendak dak maka aser tiazü lir, ta Newmai-i ashi aser NPF MLA pongu densema MLA ter aser MP densema June 7, 2023 nü Delhi

nung Union Home Minister den par kidang ajuruteper aser iba ken o dak sendakba nung onok tangatetba jangja shiogo ta, pai ashi.

"Onoki kodanga iba amala kuli kakat nung meyongnem magütsü, kechiaser Manipur litsü-lika wazüka ayutsüba sangdong, memorandum mesüra representations nung onoki kodanga shilem magütsü ta jangja-jangja metetdaksüogo," ta Newmai-i ashi.

Ano Manipur nung tang mepetmesü aliba indang nung jembidang, "Asenoki iba tensa May 3 nungi ngua arur aser yangji aliba kin balala asoshi mera tasen kar agitsü sentong lira Naga nunger aliba tesem nungbo mokongshitsüla ta asen party-i jangja-jangja shiogo. Saka Naga nunger aliba tesemtem asoshi mera kar agitsüsa süra, ibaji Government of India aser NSCN tsüngta zülutepba Framework Agreement nung ajemdaker asütsüla ta shiogo," ta pai ashi.

Naga nunger asoshi mera kar agitsü lira, itemji tang yimjung ken

o tejembidak aliba indang final solution ka ama asütsüla, ta pai nenshia ashi.

Danga linüktem nungi nüburtem aruba ajanga nütsüng yongsük aser yimtsüngtem tali akuma tebilemstü lir, saka tang Manipur nung mepetmesü adoka aliba ya talisa poppy plantation aser temesepba mozü shibelenba nungi lir, ta pai ashi.

Manipur nung party unit tentetba sülen NPF ya yimjung asoshi aser nüburtem ajungtsü asoshi nokdaker ta nüburtem dang mapa agi inyaka sayua arur, ta Newmai-i ashi.

"NPF ya party tain aser yimya tajung amshiba party ka lir. Asen party ya yimten tashi asoshi election nung adoker ruling party nung adentsü atema masü saka asenoki anepalutsü ken o danga aika lir," ta pai ashi.

Paisa Party lenir tasenpur dang Party tangatetba nung nokdaksü aser pai alitem tesem nung dang masü ajaklen maneni party tashi itshitsü aser ulushitsü ayongzükka liasü.

Nüburtemi imlaba ama aser

Party tamendak dak aser tangatetba nungi mepilai NPF Manipur unit aliba asoshi NPF secretary general, Achumbemo Kikon-ia pelaba lemsatetpa liasü.

"Manipur nung Party amenokba mapang nüburtemi NPF dak tamang makateti liasü, saka asenoki iba party ya Naga nunger atema kisung masü saka North East region nung aliba nüburtem tejangraba aser timtem ajuruba atema nokdaker ta sayutetogo," ta Kikon-i ashi.

Party mangdang maneni asangsang kuma inyaksü aser team tasenbai Manipur aser North East nung aliba nüburtem aser talisa Naga nunger asoshi mapa tajung jenti inyaksü imlar, ta pai ashi.

Iba sentong nung NPF Manipur unit parent body, advisory board, women wing, youth wing aser farmers' wing ketdangpur tenangzüktep agiba maparen Kikon-i ketdangsüa agia liasü.

State nung Party tajungba kuma yanglushia tashi itshitsü mechi Manipur unit indang kümsük küm ka ajemtsüsa akum,

ta pai metetdaksü.

Ajisüaka tang aliba team ya December 31, 2023 tashi inyaksü aser team tasenbai January 1, 2024 nungi inyaksü, ta Kikon-i metetdaksü.

NPF general convention ya Kohima nung October 21 nü amentsü, anungji iba mungdang nung Arunachal Pradesh aser Manipur unit tem nungia arua adentsü ayongzük, ta NPF secretary general-i ashi.

Newmai ya ano tir inyaksü tanaben shim aser pa den working president asem - Paul Muinao, K. Raina & Woba Joram shim, Honreikhui Kashung ya general secretary (Adm) aser danga ketdangsur 17 shima liasü.

Züngsempongu aliba advisory board nung B. D. Behring ya chairman asütsü, women wing indang executive züngsem tenet nung Sylvia Rimai ya tir, youth wing indang executive züngsem 14 nung Wungnaoshang A. Shimray ya tir asütsü aser farmers' wing indang executive pezü nung Chalinbou Chalunmai ya tir asütsü shim.

# HIV/AIDS dak sendakba nung tangazükba agütsütsü atema marathon asemtepba ka ayongzüka agi



**Dimapur, Rongjui/ September 21 (TYO):** HIV/AIDS dak sendakba nung tangazükba agütsütsü aser lanurtem anema alitsü asoshi taküm libaliro tajung benshitsü ajungmesotsü nükjidong nung Youth Fest, State-Level marathon ya PHQ Junction, Kohima nung September 21 nü tenzükja liasü.

Iba sentong nung S. Tainiu Khamniungan, NCS, Additional Secretary of the Department of Health & Family Welfare alakteta jaoker liasü, shibai HIV/AIDS indang tangazükba agütsütsü tenangzüktepba nung marathon asemtepba tenzükja liasü.

Iba sentong ya Nagaland State AIDS Control Society (NSACS) Project Director Dr. Ahu Sekhose lenisüba nung agi, kong tetokteperitem aser iba sentong pusemertemi shilem agia liasü. Sentong nung o jembiba mapang Dr. Sekhose-i, Youth Fest kübok Red Run Marathon indang lemsatop, koba National AIDS Control Organisation (NACO)-i teyari agütsüba sentong ka lir. Iba sentong ajanga lanurtem HIV/STIs amala libaliro ajanga adokdaksüba tashidaktem

nungi pila alitsü atema yimayimpong tajung süba-a temang arakzüa inyaksangshiba inyakyimtem nung shilem agidaksütsü meranger.

Dr. Sekhose-i iba sentong nükjidongji indang lemsatop kong HIV/AIDS aser temesepba mozü achirtem timba küma aoba nokdangtsü, lanurtem yongtsü nung safe sexual behavior ajungkettsü aser HIV/AIDS aser iba dak sendakba aliba service tem dak sendakba nung tangazükba agütsütsü densema lir.

State-Level marathon ya mezüng August 12 nü Nagaland kübok district 12 nung district-level marathon asaya tenzük. Ajak senteper riju 58 nungi kaketshir 519-i iba marathon nung shilem agi aser parnok rongnungi state level nung tokteptsü atema asaya 24 shima liasü.

Maneni tetsür aser teburtem rongnung state level nung mezüngbuba aser tanabuba jenjang nung takok anguba asayartem Goa nung October 8 nü asayatsü aliba National-level Red Run Marathon nung Nagaland tenüng nungi asayatsü.

State-Level marathon osang: Tebur category: 1st - Fazl Ali

College, Mokokchung nungi Sangtsoi P: 2nd - St. Xavier College, Peren nungi Witangba N Chewang aser 3rd-Government Higher Secondary School, Noklak nungi Sha. S.

Tetsür Category: 1st - Jubilee Memorial College, Mokokchung nungi Sungtiyala C. Imchen: 2nd- Government College, Phek nungi Vemuzholu Keyho aser 3rd- Government Higher Secondary School, Noklak nungi Moniu C.

Marathon asemtepba ya PHQ Junction, Kohima nung tenzük aser Ruzhukhrise Government Higher Secondary School, Kohima nung tembanga liasü. Metevinuo Sakhrie, Joint Director (IEC&MS)-i NSACS nung tepela o jembiba liasü.

Iba sentong ya HIV nungi jenboa alitsü atema külem medemer, kinunger aser lokti nem tangazükba agütsütsü, HIV/AIDS agi tonger alirtem nongita yaritsü aser item nisungtem mesenmetui amshiba anema raratsü asoshi tangazükba agütsütsü nükjidong nung ayongzüka liasü. Sentong ayongertemi iba ajanga HIV anema rara nung shilem agitsü nüburtem timba ajungmesotsü imlaba lemsatopa liasü.

# Nagaland nungi tetsür NCC band-i 2024 RD parade nung shilem agitsü



**Kohima, Rongjui/ September 21 (TYO):** Küm shia linük kübok tesem balala nungi NCC cadet temi HQ Directorate General NCC, New Delhi ayongzüka agiba Republic Day Camp nung sentong aser tetoktepba balala nung shilem agia arudar.

Nagaland nungi puti otsü nung tang mezüngbuba NCC Group, Kohima kübok 1 Nagaland Girls Battalion NCC, Kohima nung züngoksema aliba St Mary's Cathedral Higher

Secondary School, Lerie nungi 25 NCC Junior Wing cadet temi the NCC North Eastern Region (NER) Directorate tenüng nung Republic Day Camp 2024 nung shilem agitsü aliba NCC Brass Band nungi shilem agitsü.

Arishi küm 13 nungi 15 tsüngda aliba NCC cadet 25-i Republic Day Parade 2024 atema Marching Band nung shilem ka ama Kartavya Path nung march asütsü.

Uniform tasen aser training dak sendakba nung institutional

jenjang nung terenemshiba tenzükogo. Iba band ya Assam Rifles, Kohima nung October 1 nungi 10 tashi training camp ka nung shilem agitsü aser iba sülen December ita agitsü aliba Pre-RDC camp nung shilem agitsü.

Parnok DG NCC, New Delhi nung Republic Day Camp atema December 25 nü apusoa aotsü, ta Manipur, Nagaland and Southern Arunachal Pradesh, Ministry of Defence, PRO & otongdar-i sangdong ka ajanga metetdaksü.

# Mokokchung Town Lanur Telongjem-i asükhu lemsatop

**Mokokchung, Rongjui/ September 21 (TYO):** Mokokchung Town Lanur Telongjem (Mokokchung Town Youth Organization)-i sangdong ka ajanga September 21 nü K. Station village (Tseminyu) nung gari tsükokba lendong ka nung nisung ti tashi asüba osang angazüka kanga aoksaba aser mulung koremba lemsatopogo.

Onok mulungzürep lemsateptsü o agi rasa ashitsü makoker aser ano talisa lendong nung asürtem ajak lanur dang liasü aser karbo tawa-ang tatidang ajangteter mapa agizüka inyaksü lia taküm samaba angazüka tali mulung koremer. Iba ya Naga nunger asoshi takoksa tulu lir, ta MTLT-isa ashi.

Taküm ya Tsüngrem meyong asünung MTLT-ia, mangyim jashi tia nung aliba mapang asür kinungertem atema tulusang Tsüngrem dang anisüngzük meshia sarasademtsütsüba dak alaker kecha minyaktetsü, aser asür tanüla teti tatem makdak anisüngzük angutsü asoshi sarasademja atar, ta kasa sangdong ajanga metetdaksü.

Kasa mapang nung lendong atalokba sülen lenla balala nungi teyari agütsüba angazüka MTLT dak kanga kongshio go lemsatopogo. Tseminyu aser Wokha nungi Nagaland Police, SDRF personnel aser lokti tentet balala shirnokisa teyari tulu agütsügo parnok ajak nem tenüngsang agütsüba MTLT-i lemsatop.

Lisem bener aliba tata gari kati nener aliba tasümgangtem agitetsü asoshi mapa tasak sür asütsü südi, ajisiüka ghonda aika ajak longjemer inyakba sülen tasümgangtem agitettetogo aser iba ajanga asenok ajak anisüngzükdaksüogo.

MTLT-isa, asür kinungertem nem sen lakh anana ex-gratia agütsütsü nangzükba atema Chief Minister Neiphiu Rio dang kanga pelaba lemsatopa liasü. Telongjem-isa, Home Minister Shri Y. Patton gari tsükokba tera jangjatsü atema ken o bushisüngdangtsü tetuyuba agütsüba atema pa danga kanga pelaba metetdaksüogo.

Maneni MTLT-i, state nung tawa gari tsükokba lendong timba küma aoba indang ya süoki ia agitsü atema Nagaland Transport Department dang mepeshia metetdaksüogo. Item lendongtem nung taküm samaba ajanga kibong aika nung takoksa ajurur.

MTLT-i, department dang ken o bentetsü atema stakeholder ajak anisemer shisatsü lemsatopba sentong ka ayongzüka agitsü shidanga liasü.

Iba dak sendakba nung lendi aser highway tem tekümüzüka kübok toktsütsü atema sorkar agency temi dang nüngdakra MTLT-i shisatsü aser tanga teyari balala agütsütsü mulunga lir, ta tir Imnaonen aser General Secretary Imkongchuba nati külemsangdong ka ajanga metetdaksü.

# NEZCC nung züngoksemtsü atema jaoker

**Dimapur, Rongjui/ September 21 (TYO):** Directorate of Art & Culture-i sangdong ka ajanga North East Zone Cultural Centre (NEZCC), Ministry of Culture, Government of India-i, North Eastern States nung artists, performers aser sobaliba teloktem nungi NEZCC nung züngoksemtsü asoshi applications tem jaokogo.

NEZCC tinyaktsüji iba tesem indang art tem wazüka ayutsü, innovate asütsü aser ajungkettsü atema aser nüburtem nem pei sobaliba indang tali awajema kümdaksütsü asoshi lir.

Maneni sobaliba arts aser crafts wazüka lanurtem nem belenzüktsütsü aser sama oya aliba sobaliba art wazüka ayutsü aser tashi itshidaktsütsü atema tongibangsa inyaker.

Iba nükjidong ataloktsü

atema NEZCC-i, Folk aser Tribal Cultural Troupes, Crafts persons, Artisans, Traditional Chefs (Ethnic Cuisine Artisans), Mime, Puppetry aser Traditional Games performer tem nem NE aser linük kobo tesem balala nung sobaliba benjung aser mela balala nung shilem agitsü asoshi maongka agüja arudar.

NEZCC nung züngoksemtsü atema jangraba Folk aser Tribal Cultural Troupes/Crafts persons/Artisans/Artiste temi parnok indang application benoktetsü. Shirnoksa NEZCC nung züngoksema lir parnokia renewal atema application benoktsü nüngdaker.

NEZCC nung züngoksemtsü atema application form ya <http://www.nezccindia.org.in> ajanga download sütettsü, mesüra of Art & Culture, Kohima nungi October 31 nü tashi nung agizükttetsü.



Assam Rifles aser Suburban Police Station, Dimapur, Nagaland na longjemer Half Nagargan kiyong nung tesem kar meita aoba mapang NSCN(IM) züngsem ka puogo, shiba ket nung 7.65 mm pistol ka bener liasü. NSCN(IM) züngsem den pa ket nungi apuba prangbong police nem bendanga agütsüogo.



September 21, 2023 nü New Delhi nung Union Minister Nitin Gadkari aser NCP Tir Sharad Pawar na den NCP MP Supriya Sule aser tangartem Parliament House kima tangokba noksa nung angur.

## Rajya Sabha nung Women Reservation Bill benoka o entep

**New Delhi, Rongjui/September 21 (Agencies):** Bodhbarnü Lok Sabha nung party teimbakati melungtepa Women Reservation Bill agizükba sülen Brihostibarnü Rajya Sabha senden nunga iba bill benoka o entepogo.

Brihostibarnü Rajya Sabha nung Women's Reservation Bill nung o entepba mapang BJP Tir JP Nadda aser Congress Tir Mallikarjun Kharge na o langzütepa liasü.

Congress densema Opposition-i iba bill kübok Other Backward Classes (OBCs) aser SC/ST nisungtem-a züngoktsüla, ta akhangba den külemi sangküm General election matongdangsa iba bill ya mapa küma inyaksüla, ta akhanger.

Congress party aija JP Nadda-i, linük nung mezüngbuba OBC nungi Ato kilonser agütsüba BJP-i aniba NDA sorkar lir, ta ashi.

Iba bill dak sendakba nung Trinamool Congress MP, Derek O'Brien-i, sorkari 2024 nungbo

iba bill mapa küma benoktsüla mesüra Rajya Sabha nungbo tetsürtem nem menden shilem 33 agütsütsüla, mesüra BJP-i par party nungi tetsürtem one-third shimtsüla, ta ashi.

Bodhbarnü Lok Sabha nung MP 454-i iba bill pusema vote agüja liasü.

Lok Sabha senden nung voting slips amshi aser Lok Sabha züngsem anati dang Women Reservation Bill anema vote agütsü.

Mongolbarnü Narendra Modi-i aniba sorkari Women Reservation Bill benoka liasü. Iba bill dang Nari Shakti Vandan Adhiniyam, 2023 [The Constitution (One Hundred Twenty-Eighth Amendment) Bill, 2023] ajar.

Women Reservation Bill ajanga Lok Sabha aser state assemblies aser Union Territories (UTs) nung menden shilem asemsü nungi shilem kabo (1/3rd) tetsürtem atema wazüka yutsütsü.

Women Reservation Bill

ajanga linük temzüng yanglushitsüsa akümtsü. Rajya Sabha nunga iba bill agizüktsü atema two-thirds majority nüngdaksü.

Lok Sabha nung ruling Bharatiya Janata Party (BJP) simple majority lir saka Rajya Sabha nungbo two-thirds majority mali, anungji iba bill agizüktsü atema tanga party tem teyaria nüngdaksü.

Women Reservation Bill ya Rajya Sabha nunga benoka jembitsü aser agizükra ozüng akümtsü atema sign asütsü asoshi Tir nem agütsütsü.

Bodhbarnü Lok Sabha nung Women Reservation Bill agizükba sülenbo senden thinena liasü.

Lok Sabha nung iba bill atema vote agütsü metenzükdangyongi Congress party, Bahujan Samaj Party (BSP), Janata Dal-United (JD-U) aser Nationalist Congress Party (NCP) densema opposition party aikati jelia iba bill pusema sangdonga liasü.

## Yimtenren nung tajangzük atema yimsü amshir: Priyanka Gandhi

**New Delhi, September 21 (Agencies):** Brihostibarnü Congress general secretary, Priyanka Gandhi Vadra-i, yimtenren nung tajangzük angutsü atema tamangba yimsü aser kin tenüng amshia nüburtem den yazü jembir, ta ashi.

Chhattisgarh kübok Bhilai nung Chief Minister Bhupesh Baghel-i aniba Congress sorkari ayongzükba 'Mahila Samridhi Sammelan' nung jembidang Priyanka-i Centre nung Narendra Modi-i aniba sorkari mapa manguba tebilemtsü atema mejembiba aser sorkar medemertemi anogo ka nung sen crore 1600 tajangzük anguyonga linük nung jenjang maneni atuba atema mejembiba asoshi aitsü.

Linük nung tebilemtsü onük balala paidoktsü atema sorkari tamangba yimsü aser kin tenüng amshir; iba ya nüburtem nem parnok tebilemtsü onük melemsadaksütsü atema yimtenren tsütsülen nungi asalentong yangluba lir, ta lai ashi. "Yimtenren nung inyakyimtem melenshiogo. Yimtenren nung tajangzük angutsü atema nisungtem melungsentsü amshir. Kin aser tamangba yimsü nung ajemdaker nüburtem den yazü jembir. Nüburtem nem tasüngdangba balala masüngdangdaksütsü atema yimtenren tsütsü asalentong yanglua inyaker," ta lai ashi.

"Tamangba yimsü aser kin tenüng amer vote meshirtem

dang, 'nenoki onok asoshi kechi inyaksü?' ta asüngdangang," ta Congress leniri ashi.

"Narendra Modi sorkari ayongzükba agiba G20 sentongtemji tajung liasü, kechiyong ibaji ajanga linük nüma tangdaksür, ajisüaka lenla kar nung sen tali indokogo," ta lai ashi.

Yashbhoomi (international convention centre) atema sen crore 27,000 indokogo, Parliament building tasenba atema sen crore 20,000 indokogo aser tayimtsü ana atema tayimtsü shia sen crore 8,000 indokogo, ta lai ashi.

Gari lenmangtem kanga majungba, mapa maangka maliba aser jenjang maneni atuba atema Ato kilonseri telangzüba magütsür, ta lai ashi.

Par medemer industrailist temi anogo ka nung sen crore 1,600 aazükdang kechiba aluyimertembo anogo ka nung sen 27 dang aazüker?, pai iba atemaji telangzüba magütsür, ta Congress lenirisa metetdaksü.

"Alima sabang nung senden ayongzükba nungji kecha tai mali. Ibaji India nunger ajak atema nümatangtsü lir. Ajisüaka yamaji inyakdng sensakertem aser middle class nüburtem mesendoktsüla. Parnok nem vote agüja tashi agütsürtem mamadoktsüla," ta lai ashi.

Taküm küm tatembanglen Chhattisgarh den Madhya Pradesh, Mizoram, Rajasthan aser Telangana state tem nung assembly elections agitsü.

## Indian Mission-i Canada sensotem indang Visa services anena atar

**New Delhi, Rongjui/September 21 (Agencies):** Tang India aser Canada na tsüngda tesendaktep mejungi lia Canada nung Indian Mission-i Canada sensotem indang visa services anena atar.

Canada Ato kilonser, Justin Trudeau-i, Canada nung Hardeep Singh Nijjar tepsetba nung India ketdangsertemi shilem agia lir asü masüar bushisüngdangdar, ta metetdakja liasü.

BLS International-i Indian Mission-i visa services anentsüba metetdaksü.

BLS website ajanga, "Indian Mission nungi tongtibang osang: Operational kuli kar ajanga September 21 anogo nungi osang tasen ka magütsü tashi Indian visa services anena atar. Osang maneni metetpelatsü atema BLS website repringang," ta metetdaksü.

Indian Visa Application Center Canada-ia sangdong ka

ajanga, operational kuli kar ajanga visa services anena atar, ta metetdaksü.

Nijjar tepsetba ken o nung Canada-i India dak melung malemba metetdaksü den külemi Canada-i Ottawa nung India nunger tongti ketdangser jendokogo.

2020 küm India-i Nijjar ya kiralongrar ka, ta sangdonga liasü. Taküm June 18 nü Canada kübok British Columbia nung nisung anati Nijjar khaseta liasü.



September 21, 2023 nü New Delhi nung Lok Sabha senden nung Defence Minister Rajnath Singh-i jembidang tangokba noksa nung angur.

FORM NO. 14  
[See Regulation 33(2)]

**OFFICE OF THE RECOVERY OFFICER- III  
DEBTS RECOVERY TRIBUNAL, GUWAHATI**

Suwarna Bhawan, House No. 12, New Town Path,  
Near Hanuman Mandir, G.S. Road, Ulubari, Guwahati- 781007 (Assam)

**DEMAND NOTICE**

Notice Under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule to the Income Tax Act, 1961.

**RC / 296 / 2021**  
**CANARA BANK**  
-Versus-  
**MESSERS VIVI READYMADE GARMENTS**

To,  
**(CD 1) MESSERS VIVI READYMADE GARMENTS**  
Piskim Kasom, Wife of W. Makang, Super Market, Dimapur, Nagaland, Dimapur-797112.  
**(CD 2) MRS. PISKIM KASOM**  
Resident of House No. 142, Purana Bazar, Dimapur, Nagaland- 797112.  
**(CD 3) MRS. JOYCEE LONGLENG**  
Daughter of Shinnaohei, Resident of United Colony, GHSSI Half Nagarjan, Dimapur, Nagaland-797112.

Presiding Officer, DEBTS RECOVERY TRIBUNAL, GUWAHATI-i OA/26/2021 nung ajemdaker tetuyuba agütsüba Recovery Certificate kübok sen 47,73,148.21 (Rupees Forty Seven Lakhs Seventy Three Thousands One Hundred Forty Eight and Paise Twenty One Only) den pendentelellite aser 01-12-2020 anogo nungi sen tetemlok @ 11.75% den costs sen 1,07,500 (Rupees One Lakh Seven Thousand Five Hundred Only) na anema sentsüh lir (Jointly and Severally/ Fully/ Limited).

(1) Amount due as per the Recovery Certificate:	Rs. 47,73,148.21
(2) Interest from 01.12.2022 to 30.11.2022 @ Rs.11.75%	Rs. 5,59,308.35
(3) Costs	Rs. 1,07,500.00
<b>TOTAL</b>	<b>Rs. 54,39,956.56</b>

- Iba notice agütsüba anogo nungi tenzüka anogo 15 tsüngda temalen shia aliba senji agüjang ta nü dang tuyur, senji magütsütetra Recovery of Debts Due to Banks & Financial Institutions Act, 1993 aser Rules kübok senji alangzüktsü atema inyaksü.
- Nü dang taruba ken o mangadangsa affidavit nung nü meyong kiojen aser osetsüset sangdongtsü tuyur.
- Maneni ken o angadangtsü atema nü dang tsünglanglen sign süa lir masüngdangi na 15-12-2023 anogo nung anepdang 10:30 ako nung arutsü tuyur.
- Temalen shia aliba dak alia nai item sen-a agütsütsüsa akümtsü:
  - Iba notice certificate/execution proceedings nungi tenzüka sen tetemlok agütsütsü.
  - Iba notice agütsüba aser warrant aser sentsüh angutsü atema inyaksangshiba ajak nung teindokba sen, charges aser expenses agütsütsü.

Iba anogo: 30-03-2023 nung kü meyongnem aser Tribunal seal agütsür.

**RECOVERY OFFICER  
DEBTS RECOVERY TRIBUNAL GUWAHATI**



## TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 22, 2023

### Arem shiruru o nisung na

**A**rem shiti nisung alidaki adoka nisung tepsetba, kiojen aser alu raksatsüba tebilemtsü indang Nagaland tatar senden nung jembir anogo ishika sülen ano yakanüang Wokha district nung arem shiti telok kati alu jen raksatsür külenang alu ajunga melangsar yutsüba takoksaji jepaka nüktzü malu, kechiyong aluyimertem asoshi ibaji küm piyong züsenba khen nung maka akümer. Iba ama timtem takoksa ajurubaji tajururtemi dang metet, iba jagi arem shirurui nisung nem timtem takoksa agütsüba indang shisabolu tia indang ya Lotha nungertemi süoki tayiba ia jembir. Atangji, Nagaland ama state nung arem shirurui nisung nem timtem takoksa agütsübaaji tesem shia balala lir. Tesem kar nungbo ozü aser pongzüi alu chitsür, ano tesem kar nungbo keyii kiset shiruru chitsür aser khenkhenbo nisung taküma agir. Itemji kodang bilemdangdir, nisung o nisung na tsüngda dang masü saka shiruru o nisung na tsüngdaa yimjung yanglutsü nungdakba reprangteter. Atangji, shirurutem dangbo nisungsa jenjang temaba nung alir aser shisa takaba, ajisüaka shirurutembo nisung maliyonga alima nung litettsü saka nisungbo shirurutem melira alima nung melitettsüsa timtem lendong aika ajurutsü ana nung lir. Anungji, nisungi shirurutem ya nisungtem asoshi yanglutsü ta angatetra, shirurutemi nisungtem nem timtem agütsütsüsa nisungi malitsü. Alemlü tar nung otsü nung nisung o shiruru na külemi aliba otsü asenoki jembir. Tetezü, Tsüngremi alima ya nisung o shiruru na külemi alitsü yanglutsüba tesem ka lir. Aji oda, alima nung akaba süngdonglidong aser item nungji atangba süngjanglijang aser süngolemba ajak ya tangar asoshi masü saka nisung o shiruru na asoshi yanglutsüba chiyongtsütem lir. Ajisüaka, kodang nisungtemi pei poksüng dang bilema arem shirurutem tepseta achiba dang masü saka parnok taküm alirtema talidak makatsüsa aser chiyongtsü mangutsüsa inyakdir, idangjibo arem shirurutema ayatzüra aser timtem marem nisung alidak bushia arua timtem agütsütsüsa akümer. Aji oda, tanü arem shirurutemi asenok nem timtem lendong agütsüba ya, tapi agidangbo masü, asenoki parnok timtemdaksütsü inyakba ajanga lir. Mapang ka nung Shamator len keyi kati nisung ka achi, iba keyiji nisung ka tanela liasü, anungji iba nisungbaji yimteni jaoka merenshitsü atema ken o asüngdang. Idangji, keyi tanela aliba nisung jagi ashi, "nenoki arem nung kü chiyongtsü shitsü mesü ajak khaseta chimar, anungji ni chiyongtsü maka ayaba agi nisung achitsüsa aküm," ta langzü, anungji yimteni paji maitsütet. Ibaji mesüka, tanü arem shiti asenok nem timtem agütsübaaji asenoki parnok alidak arem ajak chidoker moapu kümtsüba aser parnok jajaba rü ondanga kiojen aser gari lenmang yangluba ajanga lir. Iba jagi parnok timtem marem nisungtem nem kasa timtem agütsür. Arem shirurutem yabo nisung amato masü, parnok jajaba lenmang terü ka dang lir, anungji idakji dang jajatsü. Ibaji meteta tangar state nungbo highway ajangdanga shirurutem oli aruli jajatsü atema lenmang sademsadema wazüka yutsüdak 'Animal Corridor' ta zülur yuja angutsü. Ano, arem nung tzümetsüng arudakbo arem shiruru jenoktsü atema tangalen nungi ali tua bener arua tenem mejungketa yanglua toktsür. Item nungji asenok tangazüktsü aika lir. Ashiko, asenokibo arem shirurutemi nisung nem timtem magütsütsü atema parnokji meshimeshia samatsütsüla ta bilema alitsüa akok. Ajisüaka, iba jagi asenokang timtem talila ajurutsü. Atangji, arem shirurutemji asenok atema chiyongtsü lir, ajisüaka tangu asr tajuru apia masü saka apayua asenoki parnokji wazüka yura, iba jagi asenoksa ajangzüktsü. Ibaji angatetba agi asen tsüraburtemi shirurutem tebok nung techanu bona alidang aser techanu mama yongdaksüba mapang mesüra ozü entsü amokba mapangbo metepset toktsür ta shia aru. Tanüa asenoki item ajakji angateta benshitsüla aser government nung arem shirurutem anepalur ketdangsertemia item teinyaktsütemji tamangba yimsü amato küma amangtsüsa nübortem nem angatetdaksütsü tim. Asenoki angatetsüba kaji, nisungi parnok nem timtem magütsüra arem shirurutemi nisung nem timtem magütsür. Ashiko, parnokia nisungji parnok madak kibur ta meteta alitsü südi.

## OLEMSABANG

### OSEMLOK

- P.Renthy Jamir

Asen lenir tangateter Süpongnungsang Longkümer-i Tir Yim Yim adok 334 dt 15-09-2023 Olemsabang nung Tipu Tenem Tsüng Nungi Naring Apen Ama ta züluba nung pa den semloka oren kar zülur. Tezüluri ashi ama tang koba nung ABAM den okatsü ayongzüka ali, iba ya züzüa metoktsüi yakta telemtetba tajung ka agia tembangtsüla. Asür mi agi teka marung ama ta jembir. Saka akpo arür ajongzüka ayuba nung Asür mi aliba alongteta atem rungpora yim ajak sangtema arungba lir. Arogo otsü asüyonga kodang lawyerjagi Register tejen tasen ajak lushia bushidir yimjak nung meproksüla taku tasena zülusema alitsü kecha temenu mali. Aser katia katia mazüzüktepi kodang toktepedir asen kidanger Lotha nunger amaji ABAM nungji telemsa adoktsü. Anungji lenir tajungi ashiba amaji Tipu Tenem Tsüng Naringji bener sa makazüi tekaraba nung bentoktsüla.

Aji koma bentoktsü tasüra, iba alima nung aibelentsü meimchir yimya anungji shiri aibelen parnok bentoktsü. Yisu alimai arur lokti tentet tulu tanishiri aibelenba atema tatok meshiba tongtibang ana lir. Mezüngbuba Yisu kangki nung angenlok dang yihuda nungertemi pa zü onok madak aser onok chirtem madak toang ta atakatem meshi. Saka putu aika iba tai par nüburtemi mebentet nung tesü 1974 nung ibai tai nangzüka ya yihuda nunger rangben tai (Jews collective responsible) masütsü ta tatok meshi. Ano Roman Catholic arogo Pope Urband VIII mapang 26-6-1633 nung Scientist Galileo-i alimai anü meküta alonger ta ashiba atema pa temokok agi ali nung tsükita laishiba nung nema tai nangzükdaksür House arrest nung masü tashi ayuba Pope John Paul II mapang 31-10-1992 nung Tsüngrem aser alima tsüngdang tai nangzük. Yamajisa alima puturen metsübuba aso nung küm 100 tsüngda tatalokba tulutem, Great Events of the 20th Century (1901-2000) tongtibang rongnung tamangba yimsü aser yimten tashi agi tazüngba kakettek amokbanga ayu. (Religious and political beliefs dominated the 1974 text book battle) Aser kaket shisatsü ken O obendangdaki aotsüsa aküm. Literature goes on trail. Aji mesüka tanü Aor tamangertema küm 150 süi den külemi ABAM goes on trail ta ABAM Obendangdaki aor. Saka ya tamalen atalokba amaji Allu kümtsükilai Tzünglu jazüka yur nübur inti tsünglu nem ajadaktsür. Iba otsü ya tanü tasen ka anüng nungi tsükba masü tesüba mapang kodang Molungyimsen arogo küm 150 Jubilee amungtsü ABAM nung tenzükker akhi yimya ama jaok aji agi moatsü ta ABAM tanishir-temi lemtet. Anungji Aor tamanger ABAM nung züngsem saru shitak agütsür aikati pei angatetba nung Jubilee-i jaokbaji ozü tama par tesü ta case agiteptsü jaoker masü. Tsüngrem O jembitsü temoatsü meshia sarasademtsü atema ajar asünung aotsüla ta osang kakettek nung zülü. Saka lenzüngpur teinyakertemi aji kecha hau ta mebilem. Idangto settlement committee ya shim asüba ken o ya temer lila ta bilemer. Tenla kidangbo nenoki alima tatem tashi oa kin ajak nütsüng kümdakjang ta kuli asür. ABAM mission report reprangdangra asen kidangsür Nepal, Bhutan, China Burma limatembo yutsür West Africa Mali Cambodia Philipphines Thailand South Asia Mongolia ajakleni missionary yokba angur. Aji dang masü America lima nung Aor pastor aika tang teinyak dak lir ta osang angashir.

Joko tang ABAM teinyaktsü wadang anendaka alibaji Ao ken No 268 talangka nung mamangpur lima ta alibajagi aotsüba dang anünga lir. Aser ibaji Albania lima koba lima dang mamangbapur lima ta ajar. Parnok-i Tsüngrem mali ta ashir. (In 1967 Albania declared first atheist country in the world). Süra Albania limajagi shiba aotsü tekümtet osang bener ta ken tena ali tialong mapang ka nung Tuli nungi Molungyimsen 9Km 51/2 mile Tsüngrem osang tajung sayutsungitsü motet no ta bilemer. Lai nungbo kecha atetabonga mashibangi Yihuda O Samaria ajak nung aser alima tatem tonga nenok kü kuli asütsü ta-ang zülua lir. Changtongya Yimsen küm 1921 October nung aküm. Saka arogo küm 100 Jubilee April 7 nü 2007 nung amung, aser Jubilee nung adentsü ABAM jaok. Sentong nung ajaba ama ABAM tenüng nung Rev. Y. Alem Jamir arua aden. Aser Changtongya Yimsen arogoi ABAM Mission Fund atema tenla sen 50,000/- agütsüba bilemteter. Tangarbo tejen putu nung lenirtemi tai inyaksaba tasenba tangatetba putu nung lenirtemi tatok meshi. Asenokbo tejenpuri moatsü lemteta yutsüba tasenpuri mao.

Tezüluri ashiba ama menubajagi kecha majangzüktsü anungji Court dang mapangsa meshiloka mekazüi shir aotsüla parnok oa ochi kuli süa temeten bushia ken O ya yakta tembangtsüla. Courti ABAM nembo MAB agütsütsü ta mebilemtsüla. Lawyertemji Ghonda apir taah meshitsü. Anungji Bethlehemji onok yirusalemji asenok Impurji ozü ta ashishitepa makazütsüla. Kechiyong mekümdangra mojingi mapa inyaka itemji Sodom Gomora akümtsü. Aser kar tai mechinung Aor dang Tsüngremi yamai ashitsü. Aser kapernaum na anüng tonga mesotsü ama? Na telungi alutsü. Idangjibo nüburtemi ashitsü. Onok tsüraburtemi temenen mena aser joko mali. Aser onoki parnok tai temenen khu abener. Aiatai :5-7.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

### Football asayar nungtugu, Ronaldo Nazario-i Khrista agizüka bapti



Ronaldo Nazario

September 21, 2023: Brazil nunger football asayar nungtugu, Ronaldo Nazario-i Yisu Khrista agizüka taoba hopta baptiogo.

Brazil-i World Cup takok anguba ana nungbo Ronaldo-i

tongti shilem agia liasü. Taoba hopta São Paulo nung pa baptia Arogo ka nung Kibuba benjung nung shilem agi.

Ronaldo Luis Nazario de Lima-i pa baptiba osangji Instragram ajanga lemsatöp.

"Ni tziü masenyonga lanuwa mapang nungi tenzüka kü taküm nung Khristan yimsü ya kanga tongtibang shilem ka liasü," ta pai lemsatöp aser baptiba noksa-a kar lemsatöp.

"Baptiba ajanga tangbo ni atangji Tsüngrem chir ama bilemer. Ni asentenshir tajung lenmang nung jajatsü aser Khrista temeim dak ni amanger," ta paisa lemsatöp.

Pa arrshi küm 47 ajungtsü mapang ana nung lia pa Sao Jose Arogo nung bapti aser kasa anogo nungjisa Kibuba benjung nung aden.

Ronaldo-i tamalen Barcelona, Inter Milan, Real Madrid aser AC Milan nungi football asaya liasü aser 2002 küm FIFA World Cup nung Golden Boot sempet angu.

Pai asemben tashi FIFA's Player of the Year takok ngua liasü. Pa arrshi küm 34 asüandang pai football asaya nungi anisüngzük.

### Arogoi kaketshirtem soseta asüba atema tebilemstü akar

September 21, 2023: India nung Rajasthan kübok Kota yimti nung kaketshirtem aika soseta asüba atema Arogo lenirtemi tebilemstü akaba lemsatöpogo.

September 18, 2023 nüa Kota nung arrshi küm 16 tetsür ka soseta asü; taküm küm tenzüker tang tashi nung Kota nung kaketshir 26 soseta süogo.

Catholic Bishops' Conference of India Commission for Education & Culture secretar, putir Maria Charles-i, "Külem kaketshirtemi rongshiba aser tsüraburtemi chirnurtem dang tali imlaba ajanga kaketshir aikati soseta asüba atema sasa bilemstür," ta ashi.

Tsüraburtemi tanurtem dak tuluka imlaa rongshiba ajanga

mental health kongshir aser soseta asütsü telemstetba agir, ta pai ashi.

Kota ya New Delhi nungi kilometer 500 shi pilar lir aser iba yimti nung coaching institutes 40 dak tema nung kaketshir 150,000 jungnüa lir. Joint Entrance Exam (JEE) aser National Eligibility-cum-Entrance Test (NEET) atema item institutes nung kaketshir aikati coaching agir.

Rajasthan police-i ashiba agi, 2022 küm Kota nung kaketshir 15 soseta asü, 2019 küm kaketshir 18 soseta asü aser 2018 küm kaketshir 20 soseta asü.

2020 aser 2021 küm nungbo coronavirus wara mapang lockdown aliba agi kaketshirtem ka danga soseta masü.

Khristan putir, Charles-i,

"Nijai lapokba rejutem nung kaketshirtem südoksünemstüsa facilities mali. Coaching centers aika nung counselling magütsür," ta ashi.

India linük tesem balala nung Catholic Arogoi lapokba shisaliok reju 30,000 dak tema lir, iba denji külemi coaching centers-a aika lir.

"Onok indang institutes nung tanurtem junga anepalur aser mapang shia counselling agütsüba ajanga parnoki tayongzükba aika kokteter," ta pai ashi.

2021 küm India nung kaketshir 13,000 dak tema soseta asü aser ibaji 2020 küm den medemdangra shilem 4.5 agi teimba soseta asüba lir, ta tawa National Crime Records Bureau report ajanga metetdaktüsügo.

### Gospel Music Awards October 21 nü agitsü



September 21, 2023: Taküm Gospel Music Awards (GMA) October 21 nü Molapo Showcase Piazza nung agitsü aser iba ya 4buba GMA asütsü.

Taküm GMA nung tang mezüng 'Best International Gospel Artist of the year' award alitsü aser iba category nung Africa continent nungi kentenertem dang asütsü.

GMA Chairman, Phempheretlthe Pheto-i, onoki

iba award sentong ya küm shia tajungba dang aginer, anungji takümbo best international gospel artists of the year award-a züngokogo, ta metetdaktüsü.

"Khrista osangtajung kentenertem aser sempet tajung alirtem nem onoki item awards agüja tushiner, aser taküm entries 7-9 shi lir aser international category-a lir. Iba ya ajanga GMA sentong tajungba akümba temaitsü sayur," ta Pheto-i ashi.

Best Gospel International Artists award atema shima alirtemji Godfrey Mahlangu (South Africa), Burkina Faso nungi ATI, Edwin Mosweu (South Africa), Kamayo (Cameroon), Marlon (Zimbabwe), Katlego Moshe (Lesotho) aser Burkina Faso nungi Nikima nunger lir.

Nomination teimba ngua aliba telokji Tehila Royal Music group lir. Parnok music industry nung tang mezüng süaka nominations trok ngua lir.

GMA indang awards rongnung Best Gospel Group, Best Gospel Newcomer, Best Contemporary Gospel, Best Gospel Song Of The Year, Best Gospel Album Of The Year aser Best Gospel Packaged Album of the year lir.

GMA sentong nungsa osangtajung kentenertem tejenpurtem nem-a tetushi agütsütsü.

### ANOGO ABEN TSÜNGREM DEN

### TSÜNGREM METETBA

Saka shiba asükümer iba nung asükümdakjang. Oda pai ni nguteter, aser meteter, oda alima nung temeim, imlibilem. abendang, aser temeshiba inyakbaji Ni Kibuba lir: kechiaser item mung Ni pelar, ta Kibubai ashir." ~ Yer. 9:24.

Noah tensa alima nung temenen tulu liasü aser pei temulung nung bilemba teti tamajung aliba mapang ka nung tasü, aji oda süaka item ajak nungi Noah-i pila merükteta liasü.

Pa Tsüngrem den jajaba, temeshi aser tai makaba taküm. (Lipok 6.9) Koda sür iba ama taküm ka ya litet? ta bushira Tsüngrem metetba ajanga. Koda sür Tsüngrem junga metettsü akoker?

Kinungtsü aser kinungbo kibong akümba anogo nung la mesüra pa indang ajakbo metettsü makoker. Külemi lia, külemi lia, aser tajung tamajung ajak ajanga aodang kati ka indang tali angateter aser meteter. Yamaji temeimatali akümer. Ibaji mesüka Tsüngrem junga jangja metettsü mapang agir.

Tsüngrem O nungi Tebu Tsüngrem, Techir Yisu aser Tanela Temeshi indang meteter. Saka taküm nung Tsüngrem junga metettsü asoshi Yisu Khrista kümtetdakba ta agizüktsüla. Aser anogo ka nungi anogo ka sarasadema, amanga, tashi anga, Pa dak metaloka lia aodang tali jangja metettsü aser temeim nung aintsü.

Anungji küm nung tain akümba ama Tsüngrem metetba nung inti.

Ne taochi aintsü kü dang yariang, Kibur: Amen.

### World Vision UK nung tang mezüng tetsür ka CEO shimogo



Fola Komolafe

September 21, 2023: Khristan melungtet telok World Vision UK-i tang mezüng tetsür ka, Fola Komolafe tanurtem charity World Vision nung CEO shimogo.

Taruba ita lai Mark Sheard melentsü. Mark ya 2020 küm October ita nungi CEO liasü.

Komolafe ya tesüiba küm trok tashi Indisys Business Solutions nung CEO liasü. La yangji CEO inyakba mapang nung UK nung charity telok aika atema la advisor ama liasü.

Tamalen la IBM aser HSBC nunga inyaka liasü.

Tesüiba küm 30 tsüngda la Arogo nunga inyak aser World Vision UK nung vice chair-a inyakogo .

World Vision UK-i 1983 küm Charity Commission nung register süa liasü. World Vision UK CEO menden atema nisung 124-i tenüng agütsü aser iba nungjagi nisung 9 interview agia liasü.

World Vision UK Chairman, Douglas Millican-i, "Fola Komolafe MBE DL-i CEO Mark Sheard melentsü, ta Board-i tepela nung sangdonger," ta metetdaktüsü.

AO OSHI ANGAZÜKDAK:

TANÜ ANGAZÜKTSÜBA OJANG



Saloksara

(n) nisung dak shiruru yimya keta lia asoba (born with abnormal behavior)

\* Saloksara aketba nisungji matumalem masü.

Salu

(adj) alu tatembanglak (last border of a field)

\* Alu salulen shirurui tsünüsempongtsü chitsür.

OLONG PAITEP # 6644

Grid for OLONG PAITEP # 6644 with numbers 1-16 in various positions.

TIPIEN

- 2. Auonungchiyongtsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüung
3. Tenarong maten
4. A \_ \_ \_ g
6. Mopung apodoka
9. Tonglipang tagitsü
10. Menungra bilem
11. Aiür
13. S \_ \_ \_ k
14. T \_ \_ \_ r

OLONG PAITEP # 6643 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.

NAI-A YA METETTER MA

ALIMA NUNG OSANG KAKET TEJENTIBA 10:



- 1. Relation aller Fürnemmen und gedenckwürdigen Historien- 1605- German oshi
2. Avis Relation oder Zeitung- 1609- German oshi
3. Courante uyt Italien, Duytslandt, &c.- 1618- Dutch oshi
4. Nieuwe Tijdinghen- 1618- Dutch oshi
5. La Gazette- 1631- French oshi
6. Gazeta- 1641- Catalan oshi
7. Post- och Inrikes Tidningar- 1645- Swedish oshi
8. Einkommende Zeitungen- 1650- German oshi
9. Weeckelycke Courante van Europa- 1656- Dutch oshi
10. La Gaceta de Madrid- 1661- Spanish oshi.

Arunachal: Tezu airport yakta inyaksangshi tenzüksü

Itanagar, Rongjui/ September 21 (Agencies): Arunachal Pradesh nung tawa yanglushir aliba Tezu airport yakta inyaksangshi tenzüksü.

Osang ajanga ashiba agi, Arunachal Pradesh nung Tezu airport ya September 24 nü nungi inyaksangshi tenzüksü.

Tezu airport ya sen crore 170 intoka tawa kanga junga yanglushiogo.

Iba airport ya union civil aviation minister Jyotiraditya Scindia aser Arunachal Pradesh CM Pema Khandu

nati lapoktsütsü. Tezu airport yanglurshir aliba nung runway atsülangshio aser iba den state-of-the-art apron, modern terminal building ka, fire station ka aser air traffic control (ATC) tower ka densema lir.

Airport yanglushiba sülen Arunachal Pradesh kübok Tezu airport nung ya ATR-72-type tayimtsütem anena apusotetsü.

Maneni iba airpoet nung passenger 300 achaayangtetsü aser tarutsü nung check-in

counter-a ti kümdaktsütsü imlar.

Tzu airport runway aser fire station amala facility balala ya Airports Authority of India (AAI) achaayanga yanglushia liasü

Iba airport ya regional connectivity scheme UDAN kübok 2018 küm nungi inyaksangshi tenzükä liasü.

Iba airport ya tang Dibrugarh, Imphal aser Guwahati den Alliance Air aser Flybig Airlines tayimtsütem ajanga sendaktepa arudar.

Meghalaya CM-i telungpur telok tasen ka tentetba süoki ia bilemba lemsatep

Shillong, Rongjui/ September 21 (Agencies): Tawa tentetba telungpu telok, United People's Front of Karbi Longri (UPFKL) ya Assam o Meghalaya aser iba tesem temeket nung aliba state tem atema tebilemtsü ka kümogo.

Meghalaya Chief Minister Conrad K Sangma-i Mongolbarnü tang agia aliba state assembly session nung UPFKL tentetba indang süoki ia bilemba lemsatapa liasü.

CM-i ashiba agi, iba telungpur telok aser parnok inyakyim dak sendakba nung state sorkari jenjang agidar.

Iba telok tasen tentetba indang osang angazükaka, iba



Conrad K Sangma

telok indang itangiterem osang kecha mali mesüra parnoki

rakzükkrakdemba indanga osang kecha mali.

Osang balala dak ajemdaker sorkari kümdangshia alitsü atema inter-state arrtsü nung sepaitem tali yokogo.

Temetetsü kaji iba telok ya West Karbi Anglong nung tentet aser Assam aser Meghalaya na arrtsü nung inyaksangshia arudar.

Iba küm july ita iba telok nungi asütsü ta temulung melemi bilemba nisung ana Karbi Anglong nung apu. Tena ya West Karbi Anglong nung alir Rajesh Phangso (33) aser Sanjay Engti (32) na ta jangjaogo.

NIT-Silchar Dean mapa nungi aginogo

Guwahati, Rongjui/ September 21 (Agencies): Assam nung NIT-Silchar Dean (academics) BK Roy pa mapa nungi khen atema aginogo.

Kaketshir ka asüba dak sendakba nung institute nung kaketshirtemi longkak aitba sülen pa mapa nungi anenja liasü.

Longkak aita aliba kaketshirtemi, BK Roy-i Arunachal Pradesh nungi third-year kaketshir ka rongshia merenshiba ajanga pa soseta asü ta shia pa aitsüogo.

NIT registrar KL Baishnab-i ashiba agi, Roy ya Dr Lalit Kumar Saikia-i interim-dean (academics) ama khen atema melenzükä lir.

NIT registrar-isa, kaketshirtem dang ojang dak longkak aittsü aser parnok class tem nung adentsü mepeshiba den parnok takhangbatem ta sensaksem ajanga bentetetsü, ta ashi.

"NIT-Silchar indang noksa raksatsüra kaketshirtem tarutsü

daka kongshitsü. Anungji onoki kaketshirtem dang class temi meyipa aotsü mepeshir," ta Baishnab-i ashi.

Temetetsü kaji NIT-Silchar nung kaketshir 2000 dak temai academics dean agintsü khanga September 17 nü nungi lumia longkak aita liasü.

Kasa mapang nung Arunachal Pradesh nungi asüsang tebu, par jabaso asüba kuli jangjatsü atema NIT-Silchar ktdangsurtem anema FIR ka benoktsü amokmerenogo.

"Ozü jabaso kechiba soset asü aji metetner. Ni özü jabaso asüba kuli jangjatsü atema FIR ka benoktsü," ta asüsang tebu yagi ashi.

Tebuisa, par jabaso indang post-mortem report tang tashi mongui lir ta ashi.

Anogo ishika tejakdang longkak aita aliba kaketshirtem yagi tir Droupadi Murmu aser PM Narendra Modi na dang iba ken o bentetetsü atema jenjang tapet agitsü mepeshia

shiti zülüogo.

"Academics Dean-i pa indang tenure tetenzük nungi kaketshirtem amokmerena merenshia arudar. Iba professor yagi tanen makai nongshiba ajanga kaketshir ya soseta asü," ta kaketshirtemi zülutsü.

Arunachal Pradesh nungi Koj Buker ya NIT-Silchar kübok electrical engineering department nung third semester kaketshir ka liasü aser pa soseta asüba ajanga institute nung longkak ait tenzükä liasü.

Pa tatidang nung tamakok anguba aser back paper tem majangtetba sülen aletseta asü.

Kaketshir yagi college ktdangsurtem dang pa taruba semester atema züngoksemtsü atema melatsü asoshi mepeshi saka pai mepeshiba magizük.

NIT ktdangsurtemi ashiba agi, Koj Buker ya first semester nung subject tenet nung tamakok ngua liasü.



GOVERNMENT OF NAGALAND
DIRECTORATE OF INFORMATION TECHNOLOGY & COMMUNICATION
(Below New Secretariat) Thizama Road, Nagaland : Kohima 797001

No. DIT&C/EST/SDC-62/2013(Vol.II)

Dated Kohima 21 st September 2023

NOTIFICATION FOR EXTENSION OF TENDER

The Tender Notice issued by this office vide Tender ID No.No. 2023\_DITC\_561\_1 dated 28th August 2023 for Delivery, Installation and Maintenance of Security & Backup Solution for existing State Data Centre of Government of Nagaland is hereby extended till 27th September 2023 to allow maximum participation.

The same tender is re-notified in the following websites:

- 1. www.nagalandtenders.gov.in
2. www.nagaland.gov.in

Sd/-
Er. Sabou Yashu
Director, IT&C

# Taoba Niger tir Bazoum-i ECOWAS dang pa chioktsü mepishir

**Abuja, Rongjui/Sept. 21 (Agencies):** Mitkar temi tashiyim amshia atsüngdoker alisang taoba Niger tir-i Economic Community of West African States (ECOWAS) indang court ka dang pa mepishiogo, ta pa okatsür kati Bodhbarnü ashi.

Mohamed Bazoum ya pa indang presidential guard züngsem temi July 26 nü atsüngdok aser iba sülen pa kinungtsü aser tanur den külemi kidang pua yua lir.

Pai Nigeria yimtiba, Abuja nung aliba West African bloc indang court nung September 18 nü ken o ya benok, ta par Senegalese lawyer Seydou Diagne-i ashi.

Iba ken o nungya pa tapi agi apuba aser senzüsempongtsü temeden nung aibelenba indang shia lir, ta Diagne-i ashi.

"Yimtenren temeden nung aibelenba mechi Niger dang

tekeraba nung constitutional order amshia Tir Bazoum nem tashi amoktsütsü asoshi totuyuba agütsütsü mepishir, shiba pa kümsük matem tashi inyaktüsü."

Niger nemtenokdangba balala agüja aliba ECOWAS-i Bazoum nem tanaben yimten tashi magütsütetra mitkar tashi amshitsü, ta tekum dangtsü shia lir.

Anasa aliba Mali aser Burkina Faso linük nung mitkar temi tashiyim amshia sorkar atsüngdokba sülen Niger nunga kasa ataloka liasü. September ita linük asem ya mitkar tsütsü kati ka yariteptsü züngzüktepa Alliance of Sahel States akum aser parnok anema nokdaker mesüra bendanger tashiyim amshira yariteptsü.

Court-i Bazoum medentsüra Niger-i iba telemtetba mapa kuma inyaktüsüa ozüng agi alena lir, ta Diagne-i ashi.

Ashikülak mapa inyakba

aser lunük telungzük aser temalen security tashi ajemtsüba atema Bazoum nem temerenshi agütsütsü tebilemba lir ta Niger mitkar lenirtemi sangdonga lir.

Bodhbarnü European Union (EU)-ia ECOWAS bhukuma ashi aser Bazoum aser par kibong tekeraba nung chioktsü khanga liasü.

"EU jenzang memelenshi aser tejangja lir: Tashiyim amshia sorkar atsüngdokba nungi adokba ketdangsurtem EU-i magizüker. Tir Bazoum ya ozüng agi melaba ama Niger tir chichibaji lir," ta EU foreign affairs odongtar Nabila Massrali-i ashi.

Niger mitkartemi shiba Ato Kilonser Ali Mahamane Lamine Zeine-i EU ambassador to Niamey, Salvador Pinto da Franca jaoker anogo ka lir EU ajanga iba osang ya sangdonga liasü.

# Canada nung aliba Sikh nungeri Trudeau sorkar aitsür

**Ottawa, Rongjui/Sept. 21 (Agencies):** Canada sorkari Khalistan nunger amshiba aser India den tesendaktep mejungi akumba aika jembidang, Ato Kilonser Justin Trudeau-i Canada nung Sikh nunger telemsa adokdaksüba anentsüla, ta Sikh of America mendenpuba, Jesse Singh-i ashi.

Trudeau-i iba tensa ketdangsuba ya tezüdangtsüka lir, ta Singh-i ashi. "Canadian lenir Jagmeet Singh teyari agitsü mechi Canada nung Sikh nunger amshir. Longkak aitba mapang mesüra referendum agidang nisung 5,000 majung aden," ta pai ashi.

"India alema oa bendang lima nung alir Sikh nunger timbai Khalistani ideology magizüker. Parnoki India bhukumer aser aser onok India den lungjema lir ta ni nenok ajak nem angatetdaktüner," ta ashi.

India sorkari iba ken o tashiyim amshia bushitsüsa akum, kechiaser nisung ishikati Sikh nunger nokdakba 'hijack' asü aser kin ajunga tenüng menüktsür, ta Singh-i ashi.

Canada ato kilonser aika jembidang, pai sangdongba ya yimtenyimsüsüba tsütsü nungi ajungmeso amai lir aser pai pa asoshi ongken ator, ta Singh-i ashi.

National Alliance of Indo-Canadians tir Dr Azad Kaushik-ia Singh-i ashiba ama shia liasü. Osangbener den jembidang, Canada nung aliba Sikh nunger timbai Khalistani extremism maginer, ta Kaushik-i ashi.

"Politics ajanga iba tensa ya adok. Indo-Canadian nungertem mapang talangka nungi tetsübo nung liasü. Khalistani extremists temi Canada yutsür aotsü sangdong agütsüba ya tebilemsü tulu lir," ta pai ashi.

Kaushik-i ashiba agi, Canada nung aliba Sikh nunger temi public safety minister dang senso ajunga nem security agütsütsü mepishiogo. "Canada nung tzüzüng-ozüng sülen anidaker. Nisung shingai shinga danga yamaji ainshitsü meshitettsü, ibai asayamenü masü. Iba ama amokmerentsü ya memelar." Yimten yimsüsür shingai

Hindu nunger dang Canada yutsür aotsü sangdonga mali aser Khalistanis temi yimtenren tsütsü pa bhukumer asünung Trudeau-i parnok bhukumtsüsa akum, ta Kaushik-i ashi.

June ita Surrey nung Sikh separatist lenir tejangja ka tepsetba nung Indian sorkar indang agent dena lir ta Trudeau-i tai tongloktsüba sülen linük anaprong nungi senior diplomat meindoka India aser Canada tsüngta tesendaktep tali tamajungba akum. Trudeau-i tai tongloktsüba ya khenyongi tai aser dangari ajungmesoba mapa ka lir, ta New Delhi-i aitsüo.

Nokdanga aliba Khalistan Tiger Force (KTF) tekolakba aser India indang 'most-wanted terrorist' arishi küm 45 tain Hardeep Singh Nijjar ya mejangjaba nisung anati anüolen Canadian province, British Columbia kübok Surrey nung aliba Sikh nunger tekülem ki ka kima June 18 nü khaseta liasü. Pa tepseter nem senpet sen lakh 10 agütsütsü India-i taoba mapang nangzuka liasü.

# TENÜNGSANG AGÜTSÜR



Aso: 07-01-1931 - Asü: 12-09-2023

Ozü tsürabur asür **Tsükilemba Tzüdir** (Kelingmen) manem tenzükba anogo nungi pa sür onok mangyim tia nung alidang shirnokisa shisatsü, mapang aser rongsen agi yariogo nenok ajak dang kanga pelaba lemsateper. Talisa ajak rongnung itemibosa tenüng metetshii melitet nung tenüng kar yamai agütsür.

1. Dr. Mar (IMDH. Mkg)
2. Dr. Medem (IMDH. Mkg)
3. MTBA
4. Kelingmen Yimden aser Arogo
5. Ao Riju (Ao Academy, Mkg)
6. Wb. Metsübo Jamir, Minister, R.D. & SIRD, Nagaland
7. Wb. Tongpang Ozüküm, Advisor, Water Resources
8. Wb. I. Imkong, Ex- Minister
9. Wb. I. Meyionen Jamir, Chief Information Commissioner, Nagaland
10. Er. Chubatoshi Tzüdir
11. I. Anungba Sanglir
12. Mr & Mrs. Meyalepden Tzüdir
13. Mr & Mrs. Aso Imsong
14. Mrs. Ayangla (nurse)
15. Miss Temsüchila (nurse)

- Chirnrtem aser semchisemnrtem

# SANGDONGER

Ngati Baptist Arogo ajanga nüburtem dangi sangdong ka lemsateper.

Ngati Baptist Arogo, Mongsenbai fellowship, aser Mongsenbai ward tenüng amer tawa tanü asen Town kiyong balala nung yokya yokchi kija kar ajanga "Full time ki" asüba atema fund raise süa senzüba angashia Arogoi kanga dang sasaba osang lemsateper. Arogo aser committee-i tanü tashi nung iba ki asütsü kija shinga nema yokya yokchitsü nunglokja maka. Anungji tarutsü nung iba ama Ngati Arogo/Mongsenbai fellowship/Mongsenbai ward tenüng amer kibongtem sema kija shingai mesenzütsü sangdonger. Kiyong kar nung tanga senzüba metetra item contact number nung tongtepretepanoma.

# 9862104740/9862051810

Sd/-  
Pastor  
Ngati Baptist Arogo

Sd/-  
Convenor  
Building Committee

# Linük nung January ita tatemlen elections agitsü: ECP

**Islamabad, Rongjui/Sept. 21 (Agencies):** Election Commission of Pakistan (ECP) ajanga general elections ya 2024 küm January ita tatemlen agitsü ta Brehostibarnü sangdongogo.

ECP ajanga tanü sangdongba nungya election agitsü asoshi anogo tejangja shia mali. Tir Arif Alvi-i elections ya November 6 maleni agitsü ashiba ita ana dak tali agi alemer.

Election commission ajanga sangdong ka nung ashiba agi, constituency tem lemsaba maparen reprangshimogo aser delimitation of constituencies indang mezüng list ya September 27 nü adoktsü telemtetba agiogo.

Iba inyakyim nung tai apuba mesüra temelenshitsü aliba repranger final list ya November 30 nü agütsütsü, ta ashi.

Election nübuyim sentong anogo 54 agiba sülen election ya January ita tatemlen agitsü, ta ashi.

General elections agitsü asoshi code of conduct indang jembitsü atema political party tem den taruba ita senden ka amentsü ta ECP-i shir anogo ka lir iba osang ya sangdonga liasü.

ECP ajanga ashiba agi, election atema ozüng tatem kuma meyangludang political party tem nungi temelenshitsü agütsütsü asoshi draft code of conduct

lema agütsüo.

Tesüsa 2023 digital census sangdongba sülen constituency tem lemsashitsü nungdaker, anungji taküm election magitettsü ta ECP-i shia liasü.

National Assembly ya constitution nung mela aliba kümsük atongtsü anogo asem lia shibang, aser Constitution indang Article 224 nung elections ya assembly shibanger anogo 90 tsüngta agitsü shia lir, koba November 7 alitsü.

Saka ano Elections Act indang Section 17(2) nung census sangdongba shia commission ajanga constituency tem lemsatsü shia lir.

Tesüsa ECP den shisa lemsatepa senden amandang political party temi election agitsü mapang balala shia liasü, aser kari delimitation tasen agitsü nungdakba ashi aser party kari - talisa PTI aser PPP - constitution nung shia aliba mapang agitsü ashi.

Tir Alvi-i general elections asoshi anogo tetemsü ka shimtettsü asoshi taoba ita Chief Election Commissioner (CEC) Sikandar Sultan Raja senden ka amentsü jaoka liasü.

Ajüsüa tesüsa yanglushiba Elections Act 2017 nung tir den shisa magitepi ECP ajanga election anogo sangdongtsü tashi agüja lir.



Venezuela nung Tocoron tepuokdak alirtem sepaitemi anidena aliba noksa nung angur. Tocoron tepuokdak tesem ya Tren de Aragua gang indang headquarters ama küm aika amshia aru, kong tzübo, nightclub aser mini zoo ka densema hotel ama facility aika liasü. Brehostibarnü iba tepuodak tesem azüoktsü mechi Venezuela sorkari sepa 11,000 yoka liasü.

## NSF Trophy: A Yhome FC aser United FC Piphema-i takok angu



**Kohima, Rongjui/September 21 (TYO):** Indira Gandhi Stadium Kohima nung Angami Students' Union-i ayongzüka tang asaya aliba 23rd NSF Martyrs' Memorial Trophy nung Brehostibarnü A Yhome Football Club aser United FC Piphema nati pei tata asaya koka round of 16-i iogo.

Mezüngbuba asaya nung A Yhome FC-i goal 11-0 agi NK Brothers FC akok.

Asaya nung Yhoto sporting (30)-i minute 7, 12, 15, 56, 60 aser 79buba nung goal trok idakja asayamung nung tanabuba double hat-trick idakja

liasü. Yhome FC nungisa Kethoshelie-i (8) minute 20 aser 40buba nung goal ana idaktsü aser Vilhoubeituo (15), Avilie (27) aser Metshetsho (12) nungeria goal kaka idakja liasü.

Asaya nung man of the match naroküm General secretary Kohima Village Youth Organisation Viketoulie solo-i Yhoto nem agüja liasü.

Kasa mapang nung asaya metenzük tsüingda asayamung ayongertem, asayartem aser asayar reprangertemi yashi Tseminyu-Wokha lenmang nung gari tsükokba lendong nung asürtem nem akü tetushi agüja liasü.

Brehostibarnü tanabuba asaya nung United FC Piphema-i goal 5-1 agi Reipicüzie FC Mezoma kokogo. Asaya nung Ayen-i (7) minute 16, 66, 74 aser 76 nung goal pezü idakja liasü. Parnok rongnungi Bris Taro-ia minute 46buba nung goal ka idakja liasü.

ASU tir Khriesamhailie David Mere-i man of the match naroküm Ayen nem agüja liasü.

### September 22 nü asaya:

1. NUSU Kohima Campus vs Rooster Club, Phesema @ 11:30am
2. End of an Era vs Chüziema FC @ 1:30pm.

## Nortje aser Magala na ICC World Cup nung masayatetsü



Nortje & Magala

**New Delhi, Rongjui/September 21 (Agencies):** India nung asayatsü aliba World Cup atema South Africa team renemshiba mapang tongtimbang pacers Anrich Nortje aser Sisanda Magala na yiruba ajanga masayatetsüsa kümogo, ta head coach Rob Walter-i Brehostibarnü metetdaksü.

Tena melena bowling all-rounder Andile Phehlukwayo aser seamer Lizaad Williams na team nung züngoksemogo.

Walter-i, Nortje aser Magala na masayatetsüsa

akümba atema tezüdanga bilemba lemsatepogo. "50-over World Cup nung Anrich aser Sisanda na masayatetsüsa akümba ya tezüdangtsü ka lir. Tenaprongla asayar tajung lir aser tena atenba ajanga team tashi itdaktsür," ta pai ashi.

Paisa, "tena masayatetsüsa akümba atema sasaja bilemer aser tena maneni toktepa asayatsü asoshi inyaktepba mapang tenüngdakba teyari agütsütsü," ta ashi.

Anrich Nortje ya teberem yirur lir. Australia den tanabuba ODI asayaba mapang arishi

küm 29 tain asayar ya teberem yirua liasü.

Kasa mapang nung Sisanda Magala-a temekok yirur tang anepaluba mapang lir. Asayar anaprongla ya World Cup atema team nung züngoksem liasü. Ajisüaka team, India-i Honibarnü apusoa aotsü lia asayar anapongla mapang shitak nung taneptsü mongutet aser ibayongji tena melena asayar tanga shimtsüsa aküm.

Anrich Nortje team nung madenba ya South Africa asoshi tetsükdaktsüka asütsü, kechiyong pa ya alima nung ball takaratiba anoer rongnung ka lir. India nung asayaba tajangshiba den pa indang pace aser ball bounce südaktsütsü tasa tajung aliba ajanga pa ya format ajak nung tongtimbang asayar ka lir.

Andile Phehlukwayo ya Sisanda Magala melner ama team nung anikokogo. Australia den ODI final asayaba mapang pai kanga junga batting mena liasü.

South Africa pur World Cup nung mezüngbuba asaya October 7 nü New Delhi nung Sri Lanka den asayatsü.

## Niuland Dist atema U-14 badminton selection trail ayonger

**Dimapur, Rongjui/September 21 (TYO):** District Sports Officer, Dimapur-i ayongzüka tetsür aser tebur atema Niuland District Khelo India Center U-14 Badminton selection trials

September 30 nü 9:00 ako nungi tenzüka Indoor Stadium Vihokhu Niuland nung agütsü.

Niuland District nung aliba asayartemi iba selection trail nung shilem agütsü atema original

Aadhaar card bener arutsü metetdaksüogogo. Iba dak sendakba nung osang tejangjaba agütsü asoshi iba number: 7005220196 nung tongteprateptsü metetdaksüogogo.

## Acrobatic Gymnastics Asian Championship nung Mumbai nung asayar 17-i shilem agütsü

**Rongjui/September 21, 2023 (Agencies):** Senotsü aser tanga tetsükdaktsütem aika ajangteter Mumbai nungi lanur gymnasts 17 Acrobatic Gymnastics Asian Championship nung India tenüng nungi asayatsü atema shimogo. Iba asayamung ya Uzbekistan nung October ita asayatsü, ta ketdangsurtemi Brehostibarnü metetdaksü.

Kaketshir gymnasts tem ya arishi küm 13 nungi 28 tsüingda alirtem lir aser parnok ya acrobatic gymnastics training centre, Lokmanya Shikshan Sanstha's Shree Narayanrao Acharya Vidyaniketan, (LSSSNV) Chembur nungi lir. Parnok rongnungi Bhostekar Yadnyesh, Khannukar Samarth, Uniyal Namoh aser Gosavi Ashwin nung Junior Team nung shilem agütsü. India nungi delegate 46 Tashkent-i aotsü.

Ano Jagdale Rutuja, Ekhande Priti, Khasase Aditya, Gosavi Akash, Gurav Achal, Renavkar Ashutosh, Dhokale Akshata, Patil Arna, Borade Sonali, Mahavar Naman,

Borade Ritesh, Kotheekar Kunal, aser Gore nungera team nung züngoksema lir aser Prashant (15-28) Senior category nung shilem agütsü.

India tenüng nungi asayatsü shimba gymnasts tem ya school balala nungi lir aser karbo mapa inyaktertem lir. Parnok nem coach, Rahul Sasane aser assistant coach anati training agütsüdar. Rahul Sasane ya Shiv Chhatrapati Award ngur aliba nüngtugu coach ka lir. assistant coach ana ya Yogesh Pawar aser Sunil Ranpise lir.

Pawar-i ashiba agi asayartem ya aika tetsükdaktsü aser timtem tekangshi aika ajanga aruba asayartem lir, sensaker kibong nungi adokba aser infrastructure aser amenities peri melei intetba lir, ajisüaka parnok Tashkent nungi October 18 nungi 20 tashi asayatsü aliba asayamung nung takok tajung agütsü aser shilem tajung agütsü renema lir.

Temetetsü kaji coach temi iba kaketshirtem dang taah kecha magi küm aika training agüja arudar.

## Asian Games lapokba sentong Singh & Lovlina na India wako amer asütsü



**Rongjui/September 21, 2023 (Agencies):** September 23 nü Hangzhou nung Asian Games lapokba sentong nung Hockey captain Harmanpreet Singh aser Olympic medallist boxer Lovlina Borgohain na India contingent indang wako amer asütsü.

Indian Olympic Association (IOA)-i iba continental asayamung nung nisung ana nem wako amdaktsütsü atema telemetba agia liasü.

Taküm Asian Games nung India nung asayar 655-i shilem agütsü, koba tang tashi nung India contingent tulutiba asütsü.

"Ken o kanga junga lemtepa sülen onoki iba telemetba agiogo," ta Indian contingent Chef de Mission Bhpender Singh Bajwa-i PTI dang ashi.

"Takümbo Asian Games nung contingent anitsü asoshi wako amer hockey captain Harmanpreet Singh aser boxer Lovlina Borgohain ta asayar ana shimogo," ta Bajwa-i shisem, shiba Wushu Association of India tekolakba lir.

2018 Jakarta Asian Games lapokba sentong nung nüngtugu javelin throw asayar Neeraj Chopra wako amer liasü.

Lovlina-i, Tokyo Olympics nung 69kg category nung bronze medal ngua liasü. Taküm lai World Women's Boxing Championship nung 75kg category asaya nung gold medal nguogo.

Kasa mapang nung Harmanpreet ya alima nung drag-flickers tem rongnung tajungtiba ka lir aser pa Tokyo Games nung otsüsütsüsa India team-i bronze medal anguba nung densema liasü.

India tebur hockey tem 2024 Paris Olympic Games atema indang indanga qualify asütsü asoshi Hangzhou Asian Games nung gold medal angutsü merangtsü.

Iba asayamung nung Bajwa nem deputy chefs de mission pezüi teyari agütsütsü kechiyong iba mapa ya khuret tulu lir.

Maneni Bajwa ya Indian Olympic Association-i wrestling asaya atema tentetsüba ad-hoc committee mendenbuba lir.

## BILEMDANGANG

"Temelenshi ajak pei kibong nungi tenzüksüla."